

陳菊生 著

診餘舉隅錄

上海科學技術出版社

陳敘

吾宗躬生。以醫國之才。守傳家之學。脈審樞關。術受奇腧。垣見一方。爭飲上池之水。月爲千軸。不私禁要之書。以爲兩漢意傳。初不信史。三家俞矯。僅屬寓言。丹溪辨疑。尙乖通元之旨。高陽僞託。益損叔和之真。非出手編。孰抒心得。於是覲縷往迹。昭示來茲。凡夫診脈處劑之宜。寫下溫中之辨。靡不鉤元提要。剖毫析芒。本布帛菽粟之言。闡金匱玉機之蘊。將以發揮名理。啓導愚蒙。任舉一隅。皆資三反。登之梨棗。將爲壽世之謀。尋在枌榆。許附贈言之義。允頤猶知藥性。罕讀方書。囊在春明。管墨未疾。賴君和緩。起我膏肓。遂解帶以寫誠。益推襟而送抱。習聞緒論。具識淵衷。君每誦孫真人之言曰。膽欲大而心欲小。知欲圓而行欲方。自謂生平心知此意。故能披販導竅。噓枯吹生。予維君介石貞操。渾金令器。範爲士則。瞻盎辟之容。學有師承。秉庭闈之訓。疑其敦謹。罕識變通。而乃察色覘臺。不差累黍。審同辨異。妙悟循環。游心於虛。獨析三停之秘。銀手如斷。是爲九折之良。如用兵而出奇。將由技而進道。固知俞跗治病。不在湯液之間。岐伯論醫。別具神明之用。非夫懸壺市技。膠柱審音。所可絜量短長。較論得失者矣。活人無算。待樹蘇家丹橘之林。惟我知言。請讀華氏青囊之帙。歲在丁酉日長至。武進陳允頤敘。

柯敘

語云。儒者不爲良相。必爲良醫。以醫之治病。與相之治國。同其道也。顧世之習醫者多矣。卽著爲書。亦復汗牛充棟。大都可訾者多。而可法者少。醫豈易言哉。陳君躬生。爲毗陵名下士。早歲講求醫理。既得家傳。而加以天資學力。迥非流俗所可同年語。中年客遊南北。活人無算。公卿交譽。聲名藉甚。予前在津門。獲交躬生。孱軀多病。時賴診治。受惠孔多。今年需次金陵。夏秋之間。得伏暑證。羣醫皆主燥溼利導。日見其憊。幸值躬生來應鄉試。過我一診。卽用滋陰重劑。與諸方迥別。果一服而大效。三四服而豁然。舉此一端。其醫學之精。已可概見。出診餘舉隅錄。

見示。皆其生平所治疑難各證。或溫或清。或補或瀉。或重劑或輕劑。或用急法或用緩法。或數人同患一症而彼此治各不同。或一人迭患一症而前後治又不同。其臨診也如珠走盤。無呆滯處。其辨症也如鏡鑒形。無模糊處。其用藥也如稱有權。無游移處。其製方也如網在綱。無鬆懈處。雖頃刻告危。不難立救。縱累年宿恙。亦可挽回。洵醫學中不經見之書。非若他書揣摩影響者所可比也。夫人能通天地人者。爲名儒。消息寸關尺者。爲良醫。菊生以儒兼醫。異日此書一傳。有功醫道。當非淺鮮。卽謂與良相媲美。亦無不可。予雖不知醫。而頻年親藥餌。亦略窺其門徑。用敢贅述數語。以諗精於此道者。

光緒二十三年歲在丁酉仲秋月古歛弟受丹柯銘謹敘。

自記

診餘偶舉一二證引申其說。爲王生攸辛監祖。臆姪晉蕃監叔等憤排啓發之一助。其痛斥庸腐陋習處。不免言之過甚。余明知過甚而不能自已於言者。蓋以醫雖小道。人之性命攸關。安危所系。不比尋常細故。可以含混了事。粉飾過場也。至於審症實情。用藥要法。參天人之臬。酌今古所宜。則又有醫學可觀一書。頻年作客。未遑刪繁就簡。一俟訂正。即公同好。若茲所錄諸篇。不過一隅之舉云爾。

陽湖陳廷儒菊生自記於倦遊之室。

診餘舉隅錄目次

卷上

四時感冒虛脫證	一
春溫夾滯證	二
夏熱失治證	二
秋燥脫肛證	三
冬月傷寒兩感證	三
精氣不足衰證	四
氣血兩損弱證	五
咳嗽內外因證	六
咳嗽吐血大腸火證	六
喘因伏暑證	七
嘔噦虛寒證	八
反胃噎膈寒熱證	八
頭痛實火證	九
面痛虛寒證	一〇
心胸痛虛寒證	一〇
腹痛宿證	一一

卷下

少腹痛火證	一一
疝痛新久虛實證	一二
腿痛氣血虛實證	一三
痢疾表裏寒熱虛實證	一三
泄瀉陰陽寒熱虛實證	一四
大便不通虛寒證	一五
痔瘡熱毒重證	一六
淋濁新久證	一六
遺精陰陽虛證	一七
中風陰陽虛實證	一九
痿因濕熱證	二〇
痧疹虛實證	二〇
霍亂陰陽寒熱虛實證	二一
瘧表裏陰陽虛實證	二三
水腫陽虛陰虛證	二三
自汗陰陽虛證	二四

盜汗血虛非鼻證	一二五	婦人痛經陰陽證	三二一
厥逆血虛證	一二五	婦人崩漏虛實證	三二一
眩暈陰陽虛實證	一二六	胎前血虛氣虛證	三三三
目赤寒熱虛實證	一二六	隨胎血熱證	三三三
咽喉虛實證	一二七	產後熱滯輕重證	三四
牙跟腫痛風火證	一二七	產勞辨証證	三六
陰症辨証證	一二八	小兒急驚證	三七
陽症辨証證	一二九	小兒慢驚證	三七
冰炭異治證	一二九	小兒痘後危證	三七
天人參治證	三〇	童勞辨証證	三八
婦女經閉寒熱證	三一	病有定遷治無定格證	三八

診餘舉隅錄卷上

陽湖陳廷儒制生偶筆
紹興裘慶元吉生重校

四時感冒虛脫證

春夏地氣上升。秋冬天氣下降。人在氣交中。一呼一吸。與時消息。間有不和。名曰感冒。爲病本輕。平人患此。表散和解。便愈。若系虛人。初起施治。即當標本兼顧。於祛邪中。寓扶正法。否則虛虛之禍。變不可言。丁亥。余授徒於家。及門梅錦培病感冒。一月後。病勢由重轉危。一二時流。斷爲立斃。其家請診於余。余視之。身熱未清。神氣已極昏弱。脈象微不可辨。似有若無。時蓋胃虛欲脫。非補不治。因急飲以參湯。少頃。又與以米湯。米湯後。再繼參湯。更番迭進。一日數次。明日復診。脈來有神。惟夜不安寐。獨參湯外。又用冬地歸脾湯。并戒其家曰。飲藥後。必安睡。安睡後。必大便。防脫。須多備參湯以待。及飲藥一時許。果睡甚酣。夜半。果大便。便時。汗大出。如欲脫狀。頻飲參湯。得無恙。隔日又診。身熱已退。神識亦清。後以補中益氣湯。入珍湯等方。出入加減。溫補而痊。或問曰。前醫皆云此症不可服參。獨先生見之。即知非參不起。何也。余答曰。參之用不用。視症之虛不虛。人惟邪熱積滯大實症。誤用人參。釀禍最酷。乃世俗鑒此。視人參如砒毒。雖病至虛危欲脫。亦禁服參。未免太愚。夫虛者於參。譬如饑者於食。渴者於飲。實有相需以養。相賴以生之勢。惟其人不饑而食。不渴而飲。所以停積爲災。使見停積爲災。遂疑飲食非生人之具。甘饑渴而死。有是理乎。喻嘉言曰。人受外感之邪。必先汗以驅之。惟元氣旺者。外邪始乘藥勢以出。若虛弱之人。藥力外行。氣從中餒。輕者半出不出。重者反隨元氣縮入。發熱無休。故表藥中。必用人參三五七分。稍助元氣。爲祛邪之主。庶使邪氣得藥。一湧而出。又曰。傷寒帛科。從仲景至今。明賢方書。無不用參。今日單除不用。全失相傳宗旨。使體虛之人。百無一活。曾不悟其害。由是而思。參爲虛人必用之藥。彼不敢用參者。盡昧斯言。

春溫夾帶證

冬令寒邪伏藏少陰。至春寒化爲火。發於少陽。由內而出。名曰春溫。與傷寒邪由外發不同。昔人治春溫。以黃芩湯爲主方。若因感受外邪。引動在裏伏熱。則先辛涼以解新邪。繼進苦寒以清裏熱。緣溫邪忌散。不與暴感門同法故也。使誤散之。胃汁劫盡。症必轉危。乙未春。余客上海。凌少遺之母。年近花甲。患春溫症。兩旬後。身熱汗出。譫語神昏。食不進。寐不安。勢已垂危。似不可治。來延余診。切其脈。虛細而疾。望其舌。苔膩而黃。令按胸脘。問痛否。聞伊答曰痛。出語聲音。頗有清朗之致。外象雖危。中氣未敗。覈脈參症。明是邪入營室。陰液被劫。脘中更有積滯未消。用羚羊清營湯加枳實。二劑。熱止神清。脈象亦靜。惟神疲氣弱。不思飲食。改用加減復脈法。二劑。胃氣漸蘇。神識亦振。再承前方去二冬加黃耆白朮。溫補而愈。按春溫症。隨地有之。上海爲多。蓋東南地氣。溫於西北。上海一隅。尤偏於東。至春令木旺。天氣與地氣。合同疎泄。不能無偏勝之弊。主治者。若知救弊補偏。得其道矣。

夏熱失治證

夏至以後。炎暑司令。相火用事。其人伏邪久鬱。適隨時氣暑熱。一朝勃發。名曰熱病。及早清之。本無大害。特恐拘守大經分證。仍用傷寒法治。勢必轉重轉危。庚寅夏。余客天津。金陵張君臥樓患病二旬。來延余診。脈浮細而疾。面赤舌赤。目呆耳聾。神昏譫語。身熱汗出。煩躁不寐者八日。米飲不進者六日。小便短赤。大便先澀後結。令人按其脘腹。拒不欲按。至少腹。更不能按。明是大熱之症。中有結糞。非急爲清下不可。因合白虎承氣。去川朴粳米。加元參花粉竹葉蘆根爲方。并告其僕曰。服藥外。恣飲西瓜水。余去。又有醫至。慮病久正虧。所藥過峻。不敢與服。改用牛黃清心丸法。入夜。猝起發狂。越戶仆地。舉室駭然。其僕記予臨去時。有恣飲西瓜水一語。即用西瓜取水飲之。神稍定。扶而入。比明。又延余往。見證較昨益危。詢知其故。因告之曰。釜底抽薪之法。古人正爲此等熱症設也。不通下竅。則上中二焦火。清亦無功。余豈不揣病情。輕以猛藥與人者。實因勢已垂危。不如此則不救。迫於弗得已也。仍用前方加小生地麥冬。飲藥一時許。即安睡。至夜。大便一次。明晨。又大便一次。神識俱清。能進粥飲。即日

又診比余至時。剛午刻。神識又昏。人謂此必病退正虛之兆。余曰不然。面色尙赤。脈象尙數。按至少腹。尙有欲拒之狀。見證仍實而不虛。神識復昏。實緣巳午二時。陽氣極盛。外火引動內火。相因而熾故也。今再服前藥一劑。服後。睡如昨。便亦如昨。從此神清。不復昏矣。後去生軍芒硝。專服石羔生地等藥。至六十餘劑。每劑藥地必用兩許。并飲西瓜至三石而後痊。夫此症起於五月。重於六月。其爲熱病明矣。古人治熱病。以白虎湯爲主。後賢劉河間創議。分三焦投藥。以苦辛寒爲主。治法具在。乃俗工不知早爲之所。致兆焚如。迫勢已垂危。又欲救車薪以杯水。名爲慎重。實則因循。幸而氣血尙充。稍延時日。否則火性至暴。頃刻燎原。雖有盧扁。其及抽薪於釜底耶。

秋燥脫肛證

春分以後。地氣動而濕勝。秋分以後。天氣肅而燥勝。秋燥致病。氣分先受。治肺爲急。人皆知之。然肺與大腸相表裏。其爲金也。則一燥從下受。往往大腸液涸。症轉爲危。辛卯秋。入都應試。畢。吾友史怡之。遣人持書。邀余往診。脈象細數。舌微有黃苔而乾。大腸燥結。便後脫肛。人見形容瘦弱。以脫肛爲氣虛。進以補中益氣湯加味。遂至異常疼痛。日夜呻吟。安寐旣不能。飲食尤少進。余思瘦人多火。此症系伏火爲患。現屆秋月。燥令。燥火二氣相併。庚金受灼殊甚。又服補氣之劑。火得補而益熾。病安得不劇。因用地冬潤腸膏。二劑。大便潤。疼痛平。能安睡矣。再用生地黃煎去竹瀝姜汁。三劑。諸恙大減。飲食如恆。後又服滋養藥。十餘服而愈。論脫肛一症。小兒氣血未壯。老人氣血已衰。或產育及久病用力過多。每患此疾。難經云。大腸與肺相表裏。肺藏蘊熱。則開。虛則脫。須升舉而補之。蓋緣氣虛不能約束故也。後人宗其議。遇脫肛症。不問何因。率用補中益氣湯爲主方。豈知治者愈是。病者愈苦。症情百出。安能以一法繩乎。如此症。燥火燦金。非清潤不可。若一於升補。邪愈實。血愈枯。後恐變不可測。昔人於大腸燥結門。有氣血耗竭。嘔逆不食。便如羊矢之戒。豈無所見而云然哉。

冬月傷寒兩感證

霜降以後。寒邪直入三陰。謂之直中傷寒。治有溫熱一法。若由三陽傳入三陰。謂之傳經傷寒。在外爲寒。入內爲

熱。按經施治。宜散宜清。而且六經傳變。厥名甚多。有巡經傳。有越經傳。有首尾傳。有表裏傳。其症以表裏傳爲至重。即傷寒兩感症也。一日太陽與少陰同病。二日陽明與太陰同病。三日少陽與厥陰同病。以其陰陽俱病。欲汗則有裏症。欲下則有表症。來勢極重。辨之不早。頃刻害人。故內經仲景皆云必死。并不言所治法。愚竊謂兩感症。外寒內熱。即冬溫症又感重寒而發者。隨其邪之輕重。按症施治。未必絕無挽回。吳鶴皋曰。易老製大羌活湯。用羌活獨活防風。防己細辛川芎白芷蒼朮黃芩黃連知母生地生草。意謂傳經者皆爲陽邪。一於升陽發散。滋陰養藏。則兩感之淺者。尙或可平。所論與愚意頗合。至乙未冬。余客上海。有茶業王某患傷寒症。身熱惡寒。頭痛項強。口乾煩渴。溺亦便燥。舌苔黃色。脈來浮舉則緊。沉按則數。表有寒。裏有熱。內外邪俱盛。非太陽與少陰同病之兩感症乎。余即師大羌活湯之意。用麻黃紫蘇荊芥防風以散外寒。用石膏知母元參生地以清內熱。又加枳壳陳皮利其氣而爲之佐。重劑投之。兩服而痊。可知傷寒兩感症。即冬溫感寒外寒內熱症。本無不治。其云必死者。爲誤治者言之。非謂概不可治也。其不言治法者。欲後人將大經條治之法。融會貫通。權其表裏寒熱。分緩急而施治。故不復爲贅言也。至六日死三日死之說。亦謂症情危急。圖治當速。遲則無及耳。豈真計日待死。絕無法治哉。方書此類正多。不可不思。

精氣不足衰證

人生五十始衰。過此以往。全賴隨時節養。設或勤勞太過。則衰甚矣。癸巳夏季。應試入都。貴大司寇來延余診。據云。去冬即有小恙。至春其恙大發。醫藥迭進。轉重轉劇。延今數月。食不甘。寐不安。面燒齒浮。溺瀉便澀。心悸汗出。肢弱體疲。耳不足於聽。目不足於視。語不足於音。一切精神。尤爲憊恍。余切其脈。浮舉似弦。沈按又微。知是血氣大虧。風陽不潛所致。先用濟陽熄風之劑。加補益以佐之。五官稍可用。四肢較有力矣。再用補氣養血之劑。頻增減以治之。心神雖不足。眠食可如常矣。餘症亦就痊矣。原此症由來。因平日勞心太過。精氣受戕。迨病起初。又治失其宜。所以衰羸至此。前於虛人感冒症。特申扶正祛邪。標本兼顧之說。蓋欲主治者。遇此等虛弱證情。爲之早

籌全局也。至論病後攝養。要藥有二。大法有三。所謂二者何。一曰鹿茸。二曰人參。蓋非茸不能補督脈之精。非參不能補五臟之氣。所謂三者何。一曰益。二曰復。三曰恆。益者益其正氣。復者復其元精。恆者恆久而後奏功。竊見今人有病後失於調理。終身羸弱不堪者。是氣之傷也。有病未復元。即起勞役。時愈時壞。後竟無可挽回者。是精之奪也。有病愈後。急需調養。聽人訛說。謂補藥不宜多服。因循自誤者。是功敗於垂成也。惟有明理人。知精與氣爲吾身至寶。既虧損於前。思補救於後。當病後元氣未復。除藥餌外。起居必慎。飲食必調。雖累月累年。不忍或勞。非自逸也。蓋養氣蓄精。猶欲出其身以有爲。不敢輕於嘗試也。則聖賢存心養性之功也。

氣血兩損弱證

人生二十曰弱。弱者。血氣未充之謂。當血氣未充時。勞乏以致疾。怯損矣。成己丑。內親蔣丙炎。時十九歲。四月中。害目赤方愈。五月初。即應試澄江。北返。又病暑溫。時而治愈。時而勞復。如是者數旬。其家疑醫藥無功。禱於神。服仙方。月餘。病益劇。速余往視。脈細如絲而數。忽寒忽熱。咳嗽喘促。口吐清涎。間有紅絲。自汗腹痛。室中略行數武。汗喘即甚。痿頓不堪。其家問病可治否。余答曰。怯損已成。姑念年少。試設法以挽回之。用十全大補湯生脈散香砂六君丸等方。出入加減治之。數旬後。忽壯熱不退。知是感冒外邪所致。另用紫蘇煎湯沖飲。得微汗。熱即退。又數旬。忽腹痛下痢。知是正氣得理。邪無所容。故另加川連數分。因勢利導之。痛痢即止。又數旬。因怒火上升。忽於午前。面赤神昏。兩起逆冷。知是命火上泛。非引火歸元不可。另以金匱腎氣丸一兩。分作三服。交巳刻。先用開水送下。並用火爐烘足。碎火即平。是症也。共治百數十日。症雖屢變。所藥不變。隨時隨症。略加數味而已。居然逐次奏功。終收全效。使所見不確。施治不專。有不因循貽誤者乎。迨病愈後。里中有老者見之。驚爲異。踵余門。求治數十年。老病。余曰。某病所以能挽回。固由醫藥功。亦由年華富。蓋年未弱冠。謂之少。年將花甲。謂之耆。少如春初草勾萌甫達。常存生長之機。耆如秋後林枝葉雖繁。隱寓衰殘之象也。惟事亦不必以常理拘耳。嘗見世之人。老而強。每勝於少而弱。是知人定亦許勝天。齊邱子曰。松柏之所以能凌霜者。藏正氣也。美玉之所以能犯火者。蓄至

精也。惟人亦然。子能藏氣蓄精。即却病延年之道矣。書一調補方與之。老者乃欣然而去。

咳嗽內外因證

肺爲五藏華蓋。體本清虛。一物不容。毫毛必咳。有外感六氣而嗽者。有內傷七情六欲而嗽者。治當先其所因。癸巳冬。余寓天津。高君誠齋之室。晨起即嗽。至暮尤甚。連咳不止。延余往診。切其脈。浮虛細數。知是寒束於表。陽氣并於胸中。不得泄越所致。用利膈煎治之。下咽即安。又曹某。每日午後。必發乾咳數聲。病已年餘。問治於余。切其脈。大部中惟左尺沉按則數。知陰分至深處。有宿火內伏。故午後陰氣用事時。上伸於肺而咳。朱丹溪所謂火鬱之乾咳嗽。症最難治也。余用杞菊地黃丸。意加減治之。十餘劑而愈。丙申冬。余又至天津。周著莪大令患咳嗽症甚劇。終夜不得臥。來速余診。切其脈。大部細數。右關尺按尤有力。知是大腸溫邪。上乘於肺而咳。用芩知瀉火湯加減。十數劑而治愈。丁酉夏初。江君鏡泉子後午前。咳嗽痰多。并見筋骨痠痛。食少神疲等症。余診之。脈來緩弱。知是脾虛寒侵。用理中湯加味。溫補而愈。此數症也。或表或裏。或虛或實。或寒或熱。如法施治。應手奏效。故先哲有言。咳嗽雖責之肺。而治法不專在肺。誠以咳嗽受病處。不盡屬於肺也。今人但知咳不離乎肺。凡見咳嗽。即以辛藥治之。一切咳嗽。不因於肺者。纏綿不已。永無愈期。迨至勞症將成。乃歸咎於肺氣不充。與肺陰不足。今試問氣何以不充。陰何以不足。非緣過服辛藥。肺經受傷之故歟。使能先其所因。不沾沾於治肺。則咳早平而金不受困。其得失爲何如耶。

咳嗽吐血大腸火證

吐血一症。有心肝脾肺腎之分。或咳血。或嘔血。或唾血。或咯血。或間血絲。或成盆或碗。辨清表裏陰陽寒熱虛實。按症施治。無不愈者。特恐病家自認爲勞。醫家亦誤認爲勞。畏首畏尾。因循從事。貽誤滋多。庚寅冬。余客濟南。楊君景澄病咳嗽吐血。醫用地榆歸尾前胡橘紅等藥治之。旬有餘日。轉重轉劇。來延余診。切其脈。濡而數。右尺獨疾。舌跟有緊貼黃色薄苔。明是大腸火逆。上灼肺金。致傷血膜。血隨痰出。遂宗朱丹溪法。用三黃瀉心湯加味。數

劑。吐紅止。咳嗽平。後又減三黃加參耆。調理而愈。丙申正月初。余旋里。吾友李經誼病。據云。初起不過咳嗽。未幾氣喘。未幾吐血。延今月餘。病益加劇。腰痛不堪。余切其脈。右尺滑疾。明是大腸火盛。上沖於肺所致。用槐花降氣湯。一劑。大便秘下紫黑血。咳嗽漸平。再劑。吐血止。腰痛輕。後承是方加減而愈。此二君也。一則體瘦。一則體肥。肥人多濕。故燥而清之。瘦人惡燥。故潤而清之。受病雖同。用藥是異。未可混施耳。或以瀉心方用大黃苦寒爲疑。余曰。火盛則血不歸經。用大黃無他。不過瀉亢甚之火耳。李士材曰。古人用大黃以治虛勞吐血。意甚深微。蓋濁陰不降。則清陽不升。瘀血不去。則新血不生也。所恐俗工辨症不明。遇內傷挾寒。亦用大黃。罔不殺人。蓋陽虛陰必越。營氣虛散。血亦錯行。須用理中湯甘草乾姜湯以溫其中。血始歸經。較前二症。或寒或熱。有天壤之別。不可不知。

喘因伏暑證

喘之爲病。有風寒。有暑濕。有痰壅。有氣鬱。有水氣上泛。有火邪上沖。致喘者不一端。要不越表裏寒熱虛實之分。先哲有言。治病以辨症爲急。而辨喘症爲尤急。蓋見庸工治喘。拘守偏見。不能隨症施治也。茲姑舉其一。王辰秋。余至天津。適張漢卿觀察病氣喘甚劇。終夜不得臥。綿延已月餘。邀余往診。脈虛細數。辯是夏季伏暑未清。陰虛火升爲患。用潤氣湯加石羔。一劑。喘嗽平。能安睡矣。後承是意加減。兩旬餘而愈。當初治時。有聞方中用石羔。傳爲大謬者。愚思症起六月。暑邪內伏。非石羔不解。何謬之有。彼以石羔爲謬者。殆患喘而不敢用石羔者也。否則辨證不明。誤用石羔治寒喘。未得其法者也。夫仲景續命湯越婢湯等方。俱加石羔以爲因勢利導之捷訣。李士材治煩暑致喘。用白虎湯。古人治火邪上沖。喘不得息者。罔不藉石羔以爲功。蓋暑喘用石羔。猶之寒喘用乾姜。虛喘用人參。實喘用蘇子。不過其症則已。既遇其症。必用無疑。俗流信口雌黃。原不足辨。所不能不辨者。此等喘症最頑。愈未幾時。條焉又發。投劑稍差。貽誤非小。丙申冬。劉偉齋大令之令郎。病喘甚劇。數日一發。發則頭痛身熱。轉側呻吟。苦不可堪。余切其脈。右部虛數。左更微不可辨。按久。又似有數疾情狀。知是陰虛陽盛。與以冬地三黃湯。喘勢漸平。繼減三黃。進以參耆。調養而痊。丁酉夏。因勞復發。他醫以頭痛身熱爲外感。而用溫疏。以形瘦脈

微爲中虛。而與補益。病勢又劇。余仍前清養法治之。旬餘而愈。可見喘系宿疾。多由氣質之偏。不得以尋常脈證相例。總恃臨證者。隨時論病。隨病論治。陰陽虛實。辨得清耳。

嘔噦虛寒證

嘔噦有氣血多少之分。有寒熱虛實之異。實而熱者。清之瀉之。可以卽瘳。虛而寒者。溫之補之。不能速愈。壬辰秋。余客天津。張鴻卿觀察來速余診。據云。風病嘔吐。延今偶觸涼風。卽泛冷涎。若將噦逆者然。余切其脈。沉細而遲。知是積寒久鬱。非用大熱藥。不足消沉痼之逆冷。不能復耗散之元陽。用四逆湯加味。重劑與之。每劑用附子一兩。共服至百數十劑。宿恙始痊。或問附子稟雄壯之質。用至一兩。不嫌多乎。答曰。大寒症。非用斬關奪將之藥不治。惟附子能通行十二經。無所不至。煖脾胃。通腸噎。療呃逆。同乾姜則熱。同人參則補。同白朮則除寒濕如神。爲退陰回陽必用之味。近世疑而不用。直待陰極陽竭。而用已遲矣。古人於傷寒陰證厥逆直中三陰。及中寒夾陰。雖身熱而脈細。或虛浮無力者。俱用附子以溫理之。或厥冷腹痛脈沉細。甚則唇青囊縮者。急須生附以溫散之。東垣治陰盛格陽。面赤目赤。煩渴引飲。脈來七八至。按之卽散者。用乾姜附子湯加人參。余於此症。附子外又加乾姜吳黃白朮人參。共服至百餘劑而止。可見陰寒固結。非重劑不爲功也。

反胃噎膈寒熱證

飲食之後。氣忽阻塞。如有物梗者。名曰噎。心下格拒。錢不能食。或食到喉間。不能下咽者。名曰膈。如食下良久復出。或隔宿吐出。名曰反胃。症有寒熱虛實之分。己丑夏。同邑張姓室。病噎膈症。據云。患已三年。初起數旬一發。今則五日一發。三日一發。飲食減少。大便燥結。較前尤劇。余診之。脈虛濡細澀。右關獨滑數。其時天氣甚熱。病者獨穿夾衣。畏寒不已。知是胃脘熱滯。清不升。濁不降。中宮失健運之司。治以開關利膈。湯加石羔枳實。一劑。舒快異常。二劑。夜半腹中忽痛。便泄一次。復診。脈象右關已平。餘部亦起。去石羔枳實。參用旋復代赭湯。後又加四君子湯。調補而愈。丁酉秋七月。應試金陵。柯受丹觀察。爲汪君鶴清。治一反胃症。據云。前病外症。愈已半年。後漸神

倦體疲。食入即吐。余見其鼻準有紅紫色斑如豆大。切其脈。六部滑數。尺尤有力。知是腸胃宿火未清。濁邪因之。上乘。非通下竅不可。初進承氣湯。去川朴加滋清藥。嘔吐即平。繼進地冬湯加味。月餘而症悉愈。此熱者清之。實者瀉之之一證也。壬辰冬。余客天津。蘇州龐某患反胃月餘。清涎時泛。食入即吐。神疲體倦。羸弱不堪。人以吐爲肝風。迭進平肝之味。不效。延余往診。脈象遲弱。知是胃中無陽。命門火衰所致。以附子理中湯加肉桂丁香。數十劑而病愈。甲午冬。余旋里。同邑毛君壽愷。病噎膈二年。食少胸悶。痿痺殊甚。余切其脈。細緩無神。知是虛寒痼疾。非重劑溫補不可。用四逆湯理中湯等方加味。症稍平。十數劑後。渠寄書問余。意欲速效。余答云。治病如行路。路有千里。僅走數里。即期速到。恐醫藥中。無長房縮地法也。嗣後附翼熱藥。俱增至一兩與八錢。據云。服至年餘。病始痊愈。此寒者熱之。虛者補之之一證也。或見後證藥熱。迥異前證藥寒。問其所以異。余曰。太陽之人。莽速知栢可常用。雖冬月亦如之。太陰之人。參附姜桂不絕口。雖暑月亦如之。此氣質之不同也。然有時苦寒太過。素畏熱者轉而畏寒。辛熱太過。素畏寒者轉而畏熱。此又氣質之變易也。總之或寒或熱。隨證論定。見爲熱。治以寒。事宜急。緣火性至速。遲恐不及也。見爲寒。治以熱。事從緩。緣火有功效。九轉丹成。非十二分功候不辦也。故余遇熱症用寒藥。輕者一二劑即療。重者不過數十劑。并須加壯水藥以制之。至遇寒症用熱藥。輕者亦易療。重者必須數十劑。甚至百餘劑。累月經年服溫補藥者。無他。水之性緩。而用可急。火之性急。而用轉緩。譬如以水洗物。可以一洗即淨。以火煮物。不能一煮即熟。其勢然也。且清火後。必歸本於扶脾。補火後。必急顧其真陰。又有以火濟水。以水濟火。次第布施之道焉。非漫漢可以從事耳。

頭痛實火證

頭痛一症。在傷寒門。有直中傳經之別。而傳經中。又有太陽少陽陽明太陰少陰厥陰之分。至於雜症。更有偏頭風雷頭風氣虛血虛痰厥腎厥客寒犯腦邪火上冲破腦傷風大頭天行之異。所病在頭。而所因不盡屬於頭。辛卯春。濟南有王姬患頭痛甚劇。人用荊芥防風藺本。是頭痛治頭之見也。痛勢愈酷。日夕呻吟。余切其脈。數而弦。

知是陰不勝陽。陽亢無制。上湊至巔。迫而爲痛。前用風藥。猶火焚而復燭之耳。風助火勢。火借風威。痛故不可忍。治當滋水熄木。以清下法折之。冬地三黃湯加元參羚羊角一劑。大便秘。痛即平。又合生料六味丸意。加減治之而愈。後余入都。聞有一人病火沖頭痛頗重。延西醫治之。用豬脾五。盛冰於中。頭頂前後左右各懸其一。彼以爲邪火上沖。用寒冰遏之。則火衰而痛可平。不知寒從外逼。火將內攻。症之輕者。不過多延時日。或可無虞。若遇重症。尤恐火氣攻心。挽回莫及。狂西人以寒治熱。較俗工以風助火。已勝一籌。然何如用清下法折之。一服即平爲愈乎。

面痛虛寒證

面爲陽明部分。而陽維脈起於諸陽之會。皆在於面。故面痛多屬於火。惟火有虛火。有實火。實者可清。虛者不可清。乙未。余客上海。有張姓妻。小產後。兩眼中間。常有一星作痛。病已經年。問之諸醫。莫名所以然。余切其脈。細弱而遲。知是平素血虧。小產後。血尤虧。血虧則氣虧。氣虧即火虧。遂合當歸補血湯。膠艾湯加吳萸牛膝肉桂爲方。溫補而愈。考內經察色篇。以兩眼之間屬心。經又云。心之合脈也。又云。諸脈皆屬於目。西醫亦云。心體跳動不休。周身血脈應之而動。可知脈爲心血貫注之所。目又爲血脈交會之所。今兩眼間作痛。其爲心中血虛無疑。何則。經云。諸痛皆屬於心。又云。諸痛皆屬於熱。又云。心主血。心惡熱。夫熱。陽也。血。陰也。陰非陽不生。陰非陽不守。陰耗則陽氣獨勝。無所依附。勢必循脈上浮。湊於兩眼之間。安得不痛。余以補血爲君。補氣爲臣。補火爲佐。引熱下行爲使。病果應手而效。在麻衣相法。指兩眼中央爲山根。吾將以山根痛名之。附於眉稜痛眼眶痛之後云。

心胸痛虛寒證

心痛一症。靈樞有腎心痛胃心痛脾心痛肝心痛肺心痛真心痛之分。蓋五藏之滯。皆爲心痛。金匱用九痛丸。始九種心痛。後人以飲食氣血寒熱悸逆疰別之。雖祖此義。實未盡內經之旨。約而論之。要不過陰陽虛實。然實而屬陽者易瘳。虛而屬陰者難愈。庚寅冬。余至山京。有友朱漢貽患心胸痛。或數日一發。或一日數發。如是者六七

年。余切其脈。濡數少神。知是肝脾心痛。既寒且虛。與以溫補重劑。服之。有小效。無大效。因思症系中空。甘草可滿中。並能緩急止痛。仍前方加炙甘草至壹兩。痛果大愈。但此症由境遇不遂所致。且患已數年。除根不易。其時有謂炙草一味。前方已用五錢。今又加至壹兩。毋乃太多者。余曰。甘草生用氣平。炙用氣溫。其性能協和諸藥。故有國老之稱。昔仲景甘草湯。甘草芍藥湯。甘草茯苓湯。炙甘草湯。以及麻黃桂枝葛根青龍理中四逆調胃建中柴胡白虎等湯。無不重用甘草。惟遇嘔吐腫滿。酒客諸濕症。概禁不用。則以用藥治病。有宜忌之分也。世俗治病。不明宜忌。甘草一味。重用不敢。不用不能。凡立一方。但用數分。以爲如此。乃兩全之計也。不知其計愈巧。其識愈庸。汪詡庵曰。時醫用甘草。不過二三分而止。不知始自何人。相習成風。牢不可破。殊屬可笑。曷爲可笑。蓋笑其庸耳。

腹痛宿證

腹痛一症。有熱。有寒。有氣。有血。有濁。有蟲。有實。有虛。有內停飲食。有外感風寒。有霍亂。有內癰。治苟如法。雖數年宿恙。不難應手奏功。壬辰冬。余寓天津。蘇州嚴某。每於申時後。子時前。腹中作痛。上乘胸脘。甚至嘔吐。靜養則痛輕而緩。勞乏則痛重而急。病經十年。醫治不效。余切其脈。虛細中見弦數象。知是氣血兩虧之體。中有酒積未清。故至申子二時。蠢然欲動。嘗見書載。稅由科所治腹痛症一則。與此情形頗合。惟彼專去病。故用二陳湯加川連神曲葛根砂仁。而此則病經多年。正氣既虛。陰血亦損。法當標本兼顧。因師其方。加參朮地芍治之。服至十數劑。病果由重而輕。由輕而痊矣。當此症初愈時。十年風恙。一旦奏功。人聞其異。索方視之。以爲效固神奇。藥乃平淡。莫名所以然。殊不知治病原無別法。不過對症用藥而已。藥與症合。木屑塵根。皆生人妙品。豈必靈芝仙草。始足却病以延年。

少腹痛火證

少腹正中。爲任衝分野。厥傍。爲厥陰肝經分野。其痛滿有三。曰燥結。曰熱結。曰血結。皆爲內有留着。非虛氣也。甲午。都中有胡某。少腹氣痛。上冲兩脇。日夕呻吟。甚且叫號。并見面赤汗淋。溺少便結等症。來延余診。切其脈。痛極